

四庫全書

集部

欽定四庫全書

集部

穀城山館集卷五

五

詳校官中書臣沈鳳輝

侍讀臣孫球覆勘

總校官中書臣朱鈐

校對官中書臣潘奕雋

謄錄監生臣徐莊

欽定四庫全書

穀城山館集卷七

明 于慎行 撰

五言律詩

春日同于子冲上靈巖寺四首

寺自高齊闢山從岱嶽盤雲霞千嶂曉風雨萬松寒路
繞泉聲入花分鳥道看忽聞鐘磬發作禮叩旃檀

為訪名山勝來參梵帝筵烟霞圍寶地龍象擁諸天喻

法曇花落翻經貝葉傳朗公今化石不轉謁金仙

山有朗公石

春陰連嶽麓法界滿祇林巨壑浮雲細懸崖白日深野
僧閒入定山鳥靜多音幸共齊年侶同皈出世心

雙峰最高頂倚杖白雲扉樹杪看人出山坳送鳥飛鐘
聲衆壑滿香靄下方微三觀憑闌得因風欲振衣

寄張玉陽年兄汴上

我行殊未久君亦解朝衣世路無工拙時名有是非莫
談溫室樹聊采北山薇夢斷夷門道秋深鴈不飛

閣夜

何處夜色好月明獨倚樓一聲長笛起吹裂萬山秋風
露淒以冷星河靜欲流懷人不可見天末眇含愁

雲翠山天觀和朱可大韻

碧山吾欲隱雙屐且隨君星斗巖前接藤蘿杖底分泉
聲渾作雨嵐氣稍成雲愁對仙壇月鸞簫午夜聞

洪範池和韻

何地探靈境仙泉舊有名天光金鏡冷潭影玉壺清溪

鳥依人立林蟬盡日鳴魚龍今寂寞不畏夜珠驚

秋日同朱令君泛舟西汀二首

舊向滄洲隱今陪茂宰遊
笛聲催畫鷁帆影掛浮鷗
酒對青山暮歌翻白苧
秋花源多少路隨處有漁舟
蕩漾千峰色輕舸入翠微
鳧迎仙令鳥鷗拂野人衣
岸柳晴猶濕江雲冷不飛
天風乘醉起吹送月中歸

送崔亞沂博士遊齊

共作名山隱三秋采薇薇
寧辭今日別祇恐故人稀
斗

酒不得醉白雲相與歸秋來玄鴈度可向海門飛

樓居

樓居非有好高枕自人間夜色尊前月春陰檻外山目
隨歸鳥盡心與片雲閒未遣浮名累虛稱善閉關

夏日閒居

空林銷永日不暑亦無喧種藥時窺圃攤書每閉門雨
痕侵柱礎苔色上松根此意應誰識惟偕靜者論

東郭草堂即事

結廬非異境，負郭少將迎。
竹嶼含雲影，松牕落雨聲。
片峰當戶出，衆鳥隔林鳴。
宴坐幾無念，誰知絕世情。

過雨

五月不知暑，虛堂颯似秋。
殘虹掛溪水，片雨過城樓。
遠樹斜陽駐，深山夕翠流。
晚涼思枕簟，絕愛北牕幽。

小樓

小樓常有伴，端不歎離羣。
牖納青溪月，簷飛翠岫雲。
自藏東觀草，誰勒北山文。
最悵霜空鴈，寒聲靜夜聞。

雨中東流泉上同可大賦

風雨鳴丹谷林亭倚翠岑一尊今日酒千里故人心樹
動三秋色泉飛萬壑音夜涼橫吹起直欲想龍吟

中秋小岱山對月

此夜寒無奈瑤臺近斗牛山名真小岱月色正中秋影
入河蟾濕光翻樹鵲愁只疑參嶽頂笙鶴上宮遊

山莊即事

逃名天地闊斗室寄山椒地僻常無客林深亦有樵飯

牛春待雨放鷓夜聞簫不是淮南隱淹留未可招

有懷蘇八長史

三蘇稱大雅季子復能文老作諸侯客名高國士羣別
心燕塞雨旅舍鵲湖雲家學枚臯在詞壇已策勳

入都再遊摩訶禪林

為憶青蓮社重尋舊法堂壁題存姓字階樹閱行藏覺
路人天迴春輝佛日長爾時京落客曾識雨花香

再至長安見無絃上人移住法藏菴因聽彈琴

賦贈

別來何所住卓錫自成林
幡影香臺靜鐘聲竹院深
一
花開佛土半偈定禪心
揮手松風裏依然未鼓琴

春日同朱可大起部馮用韞太史同遊恩隆觀

暨侍中園紀事二首

常侍先朝貴仙宮上苑西
野分青嶂迴路入白雲迷
深
樹花初發閒階草自萋
當年供奉地猶揭舊璇題

小有蘭亭勝臨流一放歌
酒邊橫落照花底拂回波
何

地踈狂少吾徒聚散多春衣渾欲綠知是藉烟蘿

同館諸大城西看花二首

別苑惜春殘開尊聚舊歡花間張綺幕柳外簇雕鞍飛
雪歌中度回風掌上看倚闌渾欲醉猶索酒盃寬

十載歎西東歡娛此日同容華青鏡裏身世綠尊中花
氣看無賴鶯歌聽不窮何妨歸騎緩蹀躞受東風

朱可大邀同馮太史飲摩訶菴南園步至釣魚

臺夜眺還宿法藏精舍次日觀慈壽浮圖紀

遊四首

南園

勝會開芳苑，春愁入遠峰。
壺觴連竹樹，歌咏起魚龍。
花落空林雨，風傳別院鐘。
淹留公子愛，移席轉從容。

釣臺

行歌隨步遠，已到水雲天。
夜色千峰月，湖光萬頃烟。
銜魚孟心跌宕，脫帽態踈躓。
醉眼迷歸徑，相看枕腹眠。

法藏菴

何必躡丘壑居然鹿苑棲
片雲雙樹頂孤月上方西
罷酒聞清梵探詩見舊題
歸依空品相不省在招提

慈壽寺閣

隔夜忘醒醉窮遊別起端
紺林重駐馬寶閣幾憑闌
飛刹金銀湧迴峰紫翠盤
皇都多鉅麗是處有竒觀

三月廿八日葛龍池朱訥齋二工部馮琢吾葛

鳳池二太史同遊城西黃侍中園林看花四

首

不奈連朝病因看上苑春如何五侯第又見百花新日
映丹霞暈烟凝絳幄塵狂來無藉在幘岸白綸巾

真賞誰應共風流是舊歡藏書周太史襍被漢郎官花
氣尊中滿松聲座上寒相逢休惜醉春色欲凋殘

改席臨虛榭為歡事每竒控弦天苑騎跳劍內園兒小
榻時歌枕疎簾久對碁稍聞深樹裏風送桔槔遲

誰謂長安陌風塵此地稀山光相映帶野色自芳菲旭
日薰歌扇輕花着舞衣馬蹄歸欲懶為送惜春歸

同可大用韞登毘盧閣

人天標勝境
暇日一銜盃
烟樹重城合
香花萬井開
懷鄉遊子念
作賦客卿才
愁見門前道
車塵日夜催

毘盧閣送可大南旋

梵閣俯珠林
龍宮歲月深
幾人同嘯詠
此日復登臨
畫棟含朝雨
青峰起暮陰
不堪歡會地
又悵別離心

朱大司空挽歌八首

有偉生民傑
鴻名日月光
三朝熙揆路
八座麗文昌
尚

想玄圭錫俄驚白壁藏平生門下士歌雉不成章

此日飈輪遠何年畫閣開勲猷金匱史文賦栢梁才故
事傳西省遺恩照夜臺淒清華表月不見鶴歸來

再領河隄節三行海國春吏人虔俎豆父老愴車塵百
折風雲地諸艱社稷身祇今渠畔柳遊客亦沾巾

緬想三朝事聲華似夢中職分虞百揆爵視漢三公恍
慨回天力酸辛蓋世功惟餘秋隴上蕭瑟白楊風

十載江臯臥蒼生望更頻如何三島夢忽斷五湖春南

嶽收真氣中朝失舊臣尚方雙賜履猶覺上星辰

真宅歸丹府蓬壺第幾城化龍應是劍跨鶴不聞笙舊
戟朱門列新阡紫氣縈元公車服在餘慶屬玄成

傳道松臺路玄冬蜃衛張期門分羽騎溫室出黃腸日
月懸天藻螭龍護帝章從今鷄火次夜夜有光芒

淒涼知己報舊事總堪愁問字春風館傳經夜月樓十
年違撰屨一夕嘆藏舟惟有延陵劍堪懸宰樹秋

浪迹

浪迹長安陌，修途日以難。
河流誰謂廣，海水自知寒。
嬾存愚性，婆娑恥貴官。
春深湖上雨，何處少漁竿。

春日寄題東郭草堂

長憶青門郭，芳菲此日殷。
花開三月雨，春隔萬山雲。
夜鶴應誰怨，汀鷗且自羣。
主人有歸夢，莫勒北山文。

月夜舟行

烟江三五夜，獨月引行舟。
野色推蓬合，波光進艇留。
銀蟾天上濕，烏鵲渚邊愁。
那聽樓頭笛，懷卿鬢欲秋。

邵伯湖夜泊

日暮倚蘭橈，秋江正寂寥。
驛門斜對雨，郡郭遠通潮。
急櫓看商舶，寒燈見市橋。
隋堤前路近，欲聽月中簫。

儀真野泊

潮平揚子渡，宿昔繫扁舟。
日落波光斂，天長島色浮。
雨侵依岫樹，晴見隔江樓。
咫尺分吳楚，茫茫萬古愁。

金陵江口夜泊

孤舟江上宿，秋夢耿難成。
片月中流影，千帆夜半聲。
地

鄰桃葉渡山近石頭城倚舵聞吳詠偏令旅思生

舟中家報

澤國三千里題書轉自愁鄉心河畔草客夢雨邊舟月
落維揚夜江深建業秋歸程應未遠時撫大刀頭

魏國東園宴集

華館開名會高城倚落曛林芳秋過雨竹翠午侵雲洞
夾平臺入橋通曲水分太平多宴樂勝地屬元勳

天界寺禪房呈詔菴崇軒二丈

蕭晨遊法苑迴眺出雲峰秋色霜前鴈寒聲雨後鐘酒
隨陶令醉談許惠休從何意風塵地居然白社蹤

黃儀庭司城邀集馮虛閣

振衣山畔寺載酒寺邊樓笛散千峰雨砧傳萬井秋地
因邀月勝人擬御風遊不盡蕭森氣寒江正北流

九月八日羅康洲宗伯黃儀庭司成田鍾台宮
諭習豫南司成會集朝天宮道院

仙臺鄰上苑路出冶城邊暝落珠宮雨寒飛玉樹烟鴈

來秋水外人醉菊花前明日還重九黃鶻可更傳

西園諸同年夜宴

歡劇西園會銜盃夜色前池塘餘暮雨竹栢淨秋天月
出三山樹鐘銷九市烟良遊俱舊侶把臂惜華年

南曹諸友邀遊祖師堂

融公棲隱處遙在翠微巔徑折全無地峰回半有天鳥
啼雲洞雨花散石堂烟幸假登高會同參最上禪

牛首東峰同諸君覽眺

兩峰原自對萬壑遠相縈地盡芙蓉閣巖開薜荔屏江
光天際白山色雨中青不淺憑闌興吳歌倚醉聽

長干

白門通市里傳是古長干陌柳藏鴉曙秋潮帶雨寒橫
塘歸客斷子夜舊歌闌別是繁華地休將六代看

秦淮

秋月秦淮岸江聲轉畫橋市樓臨綺陌商女駐蘭橈雲
裏青絲騎花間碧玉簫不知桃葉水流恨幾時消

青溪

鳴珂傳舊里，彌望總汙萊。
片雨湖邊落，重橋苑外開。
草荒江令宅，花覆陸機臺。
尚想風流地，空悲異代才。

房侍御邀登觀音臺

傑觀俯重臺，烟波四望開。
霞邊千樹沒，盂底片帆來。
霜月寒相射，雲鴻暮轉哀。
滔滔大江水，到海幾時迴。

攝山夜宿予懷上人

十年渾似夢，相見各依然。
僧臘青山老，詩名白社偏。
松

間對微月竹裏聽流泉預悵明朝別西風送客船

攝山觀無盡禪師入定

師今方入定勝果幾時成法向無空滅心因不住生濕
灰猶示相稿木可為形恍忽蓮臺上人天湧化城

京口贈鄔山人汝翼

握手秋江上依然舊布袍十年燕市酒八月廣陵濤俠
骨貧逾健狂歌醉正豪不緣湖海遇何地見風騷

京口贈陳從訓文學

陳生何磊落一劔向飄零雅好詞人賦休傳博士經
蕪春渚綠薜荔舊山青莫謂江天遠微垣現客星

滁陽道中逢李棠軒年兄未至題書驛壁

江樓三日別相逐不相逢回首秋山路寒雲隔幾峰
鄉心朝見鴈行色夜聞鐘何地還盃酒應尋放鶴蹤

閏月朔日道中憶東園菊

今年九月菊應自斂芳菲秋色未云暮遊子將欲歸
繫心霜露滿凝恨鴈鴻稀想到尊前見寒香正點衣

輓中立宗侯四首

彼美銀潢彥名高魯國儒
藏書淹四部作賦侈三都
日瑩瑤臺雪天沉碧海珠
十年懷舊賞腸斷綠雲孤

誰言天路遠儵爾賦遊仙
貌憶登龍日神疑化鶴年
墨堂苔蘚閉畫閣網絲懸
忍望邾城墓蕭蕭宰樹烟

斯人不可見一代失風流
未就黃金藥先成白玉樓
才名留海內賓客散池頭
此夜朱門月空悲兔苑遊

芳草春來綠玉孫去可傷
憑誰傳舊業先自棄高堂
笙

鶴渾疑幻人琴盡欲亡平生知己淚一濕薜蘿裳

穀城山館集卷七

欽定四庫全書

穀城山館集卷八

明 于慎行 撰

五言律詩

懷寄張玉陽年丈二首

怡悵前年別綿綿歲月征積薪從古歎投杼至今驚春
雪梁園道秋江建業城行蹤何處問愁絕鴈來聲

聚散年來事茫然思不禁薄遊交道淺久宦世情深別

日楓林夢愁時桂樹吟悠悠大河水詎盡尺書心

薊門行四首為于大夫子冲賦

漁陽開幕府授鉞魯諸生廟畧魚麗陣軍符驃騎營懸
金親教射畫地細論兵半醉歌聲起風高右北平

少年多意氣仗節赴燕雲曉月懸弓影春星吐劔文防
秋歌出塞逐敵賦從軍未許平陽騎橫邀萬里勲

九月平原獵材官大合圍雪凝驕馬汗鐵澀侍兒衣塞
鴈連天起征蓬卷地飛此時都膽落前隊射鵰歸

邊烽傳大漠一劔夜臨關鳥道千重戍龍城萬仞山降
兵旗下出侯騎雪中還苦樂行間事魂銷壯士顏

奉寄李北山先生四首

當代論騷雅公存大國風源流千古見才雋一時空歲
月鴛行外江湖鶴髮中倚天長劔在猶覺氣成虹

先朝老法從白首臥巖阿避世交遊簡藏山論著多醒
酬漁父問醉倚雪兒歌大有餐霞秘紅顏盛若何

雅道何寥廓時名易陸沉不因今日論寧見異時心翦

拂千金價宮商萬籟音故交蕪沒久亦許附詞林

先君為公

舊友承采
遺詩故云

龍門何日御流想碧山隅文雅從先進聲名避大巫白
雲康樂墅春酒步兵厨早晚抽簪去能容絳帳趨

同馮殿講琢吾夜過東鄰魏光祿見泉二首

一曲宮城陌君今幾卜居小開蔣詡徑別作子雲廬花
落藏書後風生漉酒初相逢殊恨晚傾蓋意何如

舊好應無厭新知亦已歡銜盃遲月上揮麈惜燈殘世

態間堪見浮蹤拙自安所欣東壁影時近夜光寒

夏日過雙寺贈寶藏法師

偶過城北寺一憩寶公堂午飯青精滑新茶玉乳香疎
鐘沉片雨高樹出斜陽為叩經行地浮盃海路長

代書答陶比部蘭亭

落魄佳公子天涯可定居適來江上使傳得篋中書湖
海名方盛雲霄事轉疎沉冥吾所慕數飲態何如

贈人為金吾郎二首

俠少羽林郎承恩直建章臂鷹馳道側調馬御樓旁夜
月燒燈苑春風蹴鞠塲錦鞬渾未脫十日從長楊
陌上錦雲連期門校獵旋射聲銀作鎔躡影玉為鞭
草連雙兔凌空接兩鳶應憐漢飛將白首滯窮邊

可大邀遊張常侍園二首

夙慕名園勝因君載酒看山容虛榭滿竹色小樓寒地
主更新貴遊人續舊歡愁中春色過繞此一憑闌
五侯開別館平野碧湖東乳燕翻槐日鳴鳩試麥風水

窮千樹裏亭隱百花中却憶山園路芳菲正滿叢

壽寶藏上人二首

舊檢高僧傳林公勝範稀安禪多寶座印法六銖衣
雨落時聞梵花開自掩扉空門忘歲月想見劫塵微

壽者原無相何因證大齡階前雙樹老閣上片山青
地傍蒼龍闕函開白馬經應憐朝市客幾日鬢毛星

送侯六參軍

燕城秋欲暮足馬送君還投筆書生志鳴鞘壯士顏
邊

風吹錦帶海月落刀環慷慨匡時畧何年出玉關

送妹倩李子授侯門教讀

天涯思弟妹見爾帝京遊捧檄趨軍府彈冠傳子侯黃

花征路晚玄鴈塞城秋那值池塘恨臨風涕泗流

時方有亡

兄之戚故云

出塞四首為遼左李大將軍賦

塞上發鳴笳軍聲動地譁三秋徵鼓騎七校選良家曉
月分弓影秋霜吐劔花主恩何以報急為掃邊沙

銅符天上至漢將出龍城雲鳥圖成陣河山幕作營日
凝金玦色磧冷鐵衣聲早報匈奴滅西京甲第成
元戎新授鉞俠少遠從軍菟塞秋山合龍城舊路分角
聲吹凍雨旗影亂浮雲百戰城南道方成上將勲
玉節君王詔軍中夜築壇金人歸少府鐵騎散材官遠
戍三秋斷巖霜萬里寒功成多意氣歌舞入長安

懷周公瑕

苦憶吳門隱翛然一釣竿烟霞雙鬢老天地五湖寬閱

世憑烏几逃名著鷓冠何時燕市裏重逐酒人歡

詠史

十八侍中郎春深侍建章呼盧金記側蹋鞠玉樓旁夜
賜離宮酒朝薰異國香可憐秦殿女向月卷羅裳

周公瑕有書見問寄答

故人何所似契闊已多年舊事閒應記新詩老更傳花
開三徑雨門閉萬峰烟猶采相思樹封題到遠天

春日有懷東郭草堂

吾廬吾所愛雖小却宜春草色常經雨花香不受塵歸
期何日定旅夢此時真恁殺烟阜鶴臨風待主人

閤夜

隱几虛堂夜幽懷誰與論星河臨九陌鐘漏徹千門黯
淡傷春事踟躕念主恩靡蕪今已綠歸路滯王孫

報鄔山人汝翼

念子不能寐三年闕報書自緣歸興久非是故情疎南
北無寧歲江湖有索居爾時吳市隱寥落復何如

報雲翠山道士許公

契闊茅山侶書來見素心
養砂還守竈種樹已成林
月出巖泉冷花飛石洞陰
知君相憶久日聽曉猿吟

春暮

歸心無可奈先作送春歸
細草河隄合殘花苑路飛
夢迴雙闕雨思繞舊山薇
想到征輪動薰風已上衣

臥病

臥病已三月歸圖猶未成
慰留明主意推挽故交情
御

路蘼蕪發春山杜若生湖邊小行徑處處有魚羹

閉門

閉門多所適懶與病相宜岸幘全忘沐匡床久未移酒
醒微雨衣減落花時只憶河橋柳應餘未折枝

告中馮用韞宮諭朱可大丞卿見過

臥閣荒三徑惟容二仲過借書酬寂寞說劔慰蹉跎未
路交情少他年別思多東門楊柳色執袂可如何

小閣

小閣經時臥琴書靜不譁丹衷猶戀主清夢已還家幾
對春城月虛開杜曲花一牀餘文室還似住毘邪

可大遊摩訶菴有詩見示賦答

少壯歡娛地憐君只自遊一春全臥病舊事幾經秋聽
雨花間坐飛觴石上流歸心將別恨憶此更悠悠

孤鴈

池上孤鳴鴈因風憶斷行凋蕭形影共踟躕羽毛傷有
恨驚霜露無心慕稻梁如何籠伴鳥噉噉主人傍

上書

上書書未報旅思且盤桓
天意高誰問人情巧自看味
兼甘苦盡色併笑啼難耿耿孤臣志惟餘一寸丹

雨中遣使買舟

時節忽復易閒居事更幽
微風吹木杪片雨到牀頭未
解虞卿印先尋范蠡舟行裝書數卷沾濕不無愁

乞休

華髮登朝列承恩歲月深
病酬吳客問思作越人吟世

事容蕭散時名任陸沉本無匡濟畧報國在抽簪

聽姜生彈琴

客來山水際為我鼓鳴琴月泛三湘色松流萬壑音焚
香消晝永啜茗到更深莫漫彈招隱方懷桂樹吟

寄題楊夢山先生半間樓

舊有滄洲興今成綠野遊桃花千樹雨月色半間樓隱
几山光入開簾海氣收却令麟閣上圖畫想風流

新城館中夜坐

獨坐燕南館挑燈坐自深
還家遊子路去國適臣心
落月征車動寒霜客袂侵
陸沉非避世吾道在雲林

白溝河

西風吹易水曉飯白溝河
獵騎平原淺漁舟別渚多
地分燕趙敵國感宋遼
和今日逢全盛盧龍尚枕戈

途中書懷二首

聖代無高隱行藏亦有因
寡交思避世多病學全身
止足存微尚安危付鉅臣
所慙恩禮重雪涕念君親

太息宗祊計回天事信難三年頭欲白八疏口將丹璇
海波能潤瑤臺月正安漢庭多疆項誰敢測宸歡

單家橋

十載橋邊路巾車此重過秋聲連渤海寒色下滹沱避
地紅塵遠還家華髮多來時道旁柳生意稍婆娑

暮抵德州城下

瞥見漳河水燕齊兩界分郡樓融晚雪津柳掛殘雲病
骨寒應倦鄉音近稍聞明朝看海氣遙禮泰山君

荏平道中感懷

父老迎相問君今華髮歸雲霄身自貴家國事多違具
適差皆盡同遊既已稀畏看舊門巷先有涕沾衣

銅城望見雲翠諸山

歸途今日愜憑軾見吾山以爾千巖翠慙人兩鬢斑向
來多遠夢從此閉重關不似終南路依棲慕世間

立春日楊戶部廬山謫官河南枉道過訪

軒車來遠道執手意何長喜對春盤酒愁分畫省香士

龍名入洛司馬賦遊梁莫漫悲岐路雄心在四方

除夕前四日送楊戶部之官河南

送子歲云晏踟蹰可奈何酒邊生白髮雪裏渡黃河落
魄才難盡飛揚意故多春風洛陽道早晚聽鳴珂

抵舍承邢知吾侍御賜問裁答二首

海畔投簪始伊誰問索居長安千里使濟水數行書世
事焚魚外時名夢鹿餘平生周柱史避俗意何如

海嶽終堪隱風塵幾倦遊采芝隨綺季種竹待羊求月

迴春天樹江寒雪夜舟何時芳駕至尊酒一淹留

歸日王興甫文學于子冲大參來視

山齋春欲盡上客到羊求對月休愁思看山且醉遊
蟻封知是夢駒隙信如流不見芄蘭侶辭官已白頭

輓趙秀才竹里二首

別來能幾日溘已隔重泉不作鷓鴣搏海翻成鶴上天談
經溪閣月對酒竹樓烟回首東山社傷心涕泫然

連年家難劇雙淚日沾纓已嘆無兄弟誰堪喪友生延

陵荒草合管子舊臺傾更甚山陽路空聞笛裏聲

穀城山館集卷八

欽定四庫全書

穀城山館集卷九

明 于慎行 撰

五言律詩

秦山道中

地僻塵踪少山深石路斜
雨中過佛院雲裏見人家
雉飛春麥啼鶯繞落花
流亡今欲盡幾處有桑麻

上隔馬嶺舊寺

荒涼經古寺迢遞出層空
路抱千峰轉天開一竇通
殘松疎雨後頽瓦夕陽中
猶有餘僧在逢迎問轉蓬

泰山天門禪堂逢傅柱史金沙贈別

含桃花欲落山下遇君時
雨過空王殿天晴嶽帝祠
相看芳杜色各有白雲期
不似風塵路惚惚嘆別離

泰山絕頂對酒

茫茫今古事欲問岱君靈
漢栢虛稱觀秦松枉勒銘
此生遊已倦何地酒能醒
杖底千峰色依然未了青

下泰山遊三陽觀

半嶺通仙界，縈迴嶽麓西。
已看三觀迴，猶覺萬峰低。
暮雨瑤華落，春雲玉洞迷。
遊情渾未減，縹緲望丹梯。

飲三陽觀絕頂對月

孤亭堪倚嘯，一醉斗牛邊。
裊拍千峰月，觴飛萬樹烟。
花前鸞吹度，海上鶴書傳。
借問三宮路，今當幾洞天。

遊仙詞四首贈三陽觀智雲山道士

寰區不足步，聊作小遊仙。
牒秘丹繒字，山藏綠玉篇。
石

梁雲外掛瑤島月中懸欲問餐桃客蓬萊更幾千

五遊凌碧落彷彿見乘鸞瑤水銀為闕蓬丘玉作壇飛

塵成大藥毀竈出神丹舊遇華山博曾將六箸看

曾棲

華山
故云

由來稱福地自合有仙才蕭史吹笙下樂巴喫酒迴雲

軒通紫闕月宇逼丹臺謝手塵中客年光漫自頽

辭家慕冲舉名嶽且依棲遼左遲歸鶴淮南見去雞玄

霜堪入藥白石總如泥試訪清都宴雲門路欲迷

子冲携尊方山相候因謀卜集

百里行厨至追歡有報書
春城開臘蟻別墅罩河魚
白社能留客青山可卜居
未須煩地主十笏是吾廬

靈巖竹房對雨

舊日題名處山窗竹未殘
重遊春欲暮復向雨中看
暝色來千嶂寒聲到萬竿
應添禪悅味新筍入盤餐

靈巖主僧邀遊五峰亭遇雨即事

已成三日醉更上五峰亭
嶺外雲猶碧尊前雨半青
唯

然南嶽偈莞爾北山銘向夕傳清楚泠泠自可聽

靈巖禪室子冲興甫夜飲大醉

對酒不能醉明星已在天放歌知愛客縱飲是逃禪世
事驚心後時才屈指邊乾坤吾黨在把臂意茫然

買洪範泉旁隙地規作園池

誰言泉上築不作輞川看山色宜書幌溪陰可釣竿分
流防短岸樊圃避危湍稍待西疇畢移家事未難

夏日黃石山莊即事

山居涉長日散髮不容簪酒熟牀頭漉詩成枕上吟移
花常待雨種樹稍成陰欲叩金閨侶何須此陸沉

夏日山居周礪齋太史奉使周藩過邑見訪賦

贈二首

送君遠行役六月過山城細雨鐘前落微風樹裏生
瓜涼夜色車馬故交情却憶橫門道分途歲已更
夏日門常掩何因駐使車時同河朔飲地似武陵漁
天
地容高枕烟霞有定居莫將竒字問獨少著成書

因周太史使還海上寄楊鍊菴丈及澄上人一首

苦憶東林侶逢人附報書
花殘陶令宅月出遠公廬
世念歸應盡幽懷病未疎
三山知有路正擬戒遊車

午日獨酌

邑里逢佳節無歡坐草亭
年華雙鬢白心事一盃青
柳畔驚鶻花前嘆鵲鴿
少人與同醉不是獨為醒

山莊獨居

豈無山水慕只是舊遊孤
隴上遭田父墟邊問酒徒
頽

年資藥餌野性適江湖回首鷓行地春風滿鷓鴣

聞胡竺西山人被繫有懷二首

慷慨關東俠詞場舊所歡如何燕市筑忽作楚臣冠翻
覆人情險傾危世路難夜來豐獄劔虹色為君看
長缺今何適從軍赴桂林談天時網密逐客廟謨深寥
落詞人賦淒涼國士心沅湘何處望愁絕鴈書沉

十月四日張就山初至同飲東園菊花下作

上客來何暮山齋菊欲殘猶餘秋徑色聊待酒人歡艷

蓋迎霜立寒香
浥露餐晚酣
休便去新月
出林端

安我素吏部倚舟過訪酬贈

沙邊能繫纜
相顧到林廬
斗室虛高枕
衡門有駐車
挑燈秋雨後
漉酒菊花初
好在山公啟
休忘北闕書

冬夜宿香山寺

一宿招提境
匡牀坐夜分
山深遲見月
石冷細生雲
仙梵林中發
名香座上焚
老僧應出定
時覺語相聞

暮抵吳家渡楊令君攜酒宿王戶部別業

十月荒山道迷茫起暮陰淒風吹古渡寒霧結平林地
主尊壘遠山家巷路深因過故人宅懷舊一悲吟

往弔于子冲黃家渡口大雪

寒冬涉濟水雨雪滿征裘欲解留徐劔猶疑訪戴舟馬
蹄臨渡澁人跡過山稠漸近齊州路傷心觸舊遊

雪中濟南道上攜張就山同行忽失所在詩以
覓之

雨雪攜同好行行失所如細尋東郭履久駐信陵車誤

恐迷花徑寒應殢酒廬居然成間闊暝色野躊躇

張山人告行燈下言別

幽居無與晤殊喜故人來秉燭頻開卷逢花數舉盃寒
雲江上樹凍雪隴頭梅明發黃山路離愁不可裁

送張就山西遊趙國及赴蕭大司馬之召

關河水雪滿遊子去何之長揖雲中幕高談鄴下詩西
園飛蓋夜北塞勒銘時回首秋山賞能忘桂樹枝

查虞臯儀部道出濟上遣書賜問賦答二首

別緒三秋迴書來慰夢思林中醒酒後河畔倚舟時雪
靜關山影雲生澗壑姿歲寒無可贈惟有折松枝
有懷江左彥夙昔共蘭襟報國青萍器承家玉樹林郎
曹雙管舊禁漏五雲深無恙西山色猶堪拄笏吟

壬辰冬月連營兄弟二墓撫今追昔潛然有感

聊賦四首

無限傷心地連朝薤露吟仁兄歸永夜愛弟托荒岑華
萼俱凋落松楸漸鬱森寸腸摧斷久猶自涕沾襟

累歲遭家難心悲不可論魯門疑遠夢易水送歸魂取
次栽墳樹從新拭淚痕乞休曾有疏酸側動天閭
門庭思往日文雅盛當時共目三珠樹相輝五桂枝一
朝虛枕被萬事罷塤箎怊悵餘生在衰顏欲對誰
久客歸何倚孤蹤只自憐顧瞻鴻鴈影吟嘆鷓鴣篇翰
墨藏春雨池塘慘暮烟經過酬倡地無處不潸然

石門道中

風雨石門道淒淒衣袖單人家烟樹隔山徑草花寒蕭

索前朝寺荒蕪何代壇十年來往路立馬一長嘆

再過汶上路鳳岡民部出送河橋留別

邑里經年別重逢春草芳一盃臨汶水三月綰垂楊豪
俠齊公子風流漢省郎鄉山多勝賞後會莫相忘

任城魏松軒山人攜琴見過從遊溪山數日書

贈

自遣樊中累常多物外遊看君攜綠綺訪我到滄洲月
色和烟映泉聲作雨流吾廬山水際是處可淹留

南溪石上聽魏山人彈琴送別

溪樹午蕭森因君理素琴乍將流水引寫作落霞吟別
鶴飛何遠遊魚躍自深只今懷往路何處覓知音

吳門周畫師從遊溪上數日賦贈

林壑看如畫幽人此地過彈琴流水近對酒暮雲多地
僻無來往山深足嘯歌牀頭有匹練試為掃烟蘿

秋日從諸親友飲城南溪上遇雨呈亭山周師

二首

雨後南溪水新添幾尺流
壺觴陪父老笑語到林邱
掃石聊施簞烹魚旋摘鉤
酒闌更坐起隨意看鳧鷗
闊畧師生禮相將把釣竿
青山間共適白髮醉同歡
雨色尊前近灘聲樹杪寒
踏泥連騎緩歸路不知難

六月十二夜可大小酌即事

客乘殘雨至席對晚涼開
酒畔移燈去花間送月來
風流河朔會倡和栢梁才
更憶長楊路青葱玉樹栽

時乃郎試

京兆云

七夕可大小會即事和韻

小閣驅殘暑當筵夜色青樓頭生片月河畔度雙星桃
葉虛稱扇松枝戲作屏秋聲驚白紵沉醉不能聽

和可大七夕書懷

新涼浮玉宇客館易為愁天上明河夜人間白露秋逃
名惟對酒乞巧詎登樓自有豐城氣迢迢映斗牛

江右黃淮胸文學可大客也以書授其弟姪東

遊賦贈

南州有高士邂逅見風流雅醉荆卿酒常隨郭泰舟窮
經探魯壁作客佩吳鉤門下推師授名成兩夏侯

陪朱可大丈遊陶山幽棲寺絕頂同張士師李
鴻臚黃文學賦

幽棲真此地絕壁到人稀石角斜鉤杖藤稍曲挂衣壺
餐高洞險鐘磬下方微共有登臨興誰能不醉歸

陶山懷古

越相何年隱齊山舊有名地連肥子國路出鑄鄉城洞

杳秋雲白巖深古木平臨池懷往跡頗識種魚情

陶山贈張東山士師

陶朱今不見君是魯朱家俠骨千金劍仙鑪五色霞生
涯隨畜牧鄉語話桑麻早結東山隱驚看鬢有華

遊雲臺山

窈窕黃山路秋雲入幾重寒聲泉上竹古色寺前松地
隱秦時洞天連月觀峰由來真跡秘不許世人逢

同可大宿黃山張氏精舍

谷口隔疎籬林深鳥不啼石泉縈戶轉山果亞枝低
壑參差映藤蘿咫尺迷苦無向平累聊可共依棲

同可大對飲黃山玉龍峽上

看山意不厭復此濯塵纓澗落飛虹影泉飄噴玉聲
隔花分送酒鑿石共題名相對濠梁意翛然少世情

泰山客館送朱可大登嶽

息駕泰山麓何以慰所思送君九節杖拄上五松枝
澗底出雲處夜中觀海時同遊不同醉應憶舊題詩

重遊三陽觀宿

曾向春山宿重來似舊青壇風落椽栗巖雨長芝苓試
覓長生藥聊緝內景經不知涼夜永星斗掛疎櫺

三陽觀木末亭晚眺因遲可大未至

木末堪凭檻秋空四望開晚烟迷汶水落日滿徂徠酒
憶壚頭醉人從嶽頂迴那逢搖落候蕭瑟易悲來

傲來山

不斷青螺色依然萬仞峰雲間翔鷲鷲天杪秀芙蓉嶽

界三十里仙閣十二重神功何處斂此地宅蛟龍

山有芙蓉

飛鴉諸峰山下
石窟名曰龍池

同諸君飲竹林寺樹下

靈嶽多真境禪宮路更深五峰常隱日雙樹自成林涉

澗逢瑤草臨流漱玉琴晚鐘歸騎緩沉醉北山岑

寺在泰山

下址

觀泰山百丈崖瀑布

盡日水聲中還看匹練空盤渦喧萬馬削壁闢雙虹派

扶天河落源從月窟通固知靈境異融結駭神功

望仙影巖

泰山西峰石壁有仙人影側身東向

何劫飛來影分明鶴上仙側身疑面壁作禮似朝天觀
化興雲雨憑虛閱歲年扶桑終日在幾見海成田

西汀臨汎呈印泉舅氏二首

秋水寒塘淨蘭檣別渚通林端懸片雨蘋末起微風孤
嶼浮波外長天一棹中漁竿堪自老不是慕非熊

西汀懷舊隱秋杪片帆來落照樽前樹寒烟水上臺舟

移明鏡轉雲盡畫屏開笑語淹吾舅浮槎夜未迴

乙未十月傅金沙侍御殷洗心舍人過訪山中

賦贈

命駕何相值開尊夜向寒風高邊鴈盡霜冷菊花寒天
地吾徒在江湖此會難占星應有地總傍少微看

冬初傅金沙侍御過訪因韻賦和

百里寒山道勞君問隱居玄言聆喻馬往事笑焚魚嶽
色青尊外秋聲白苧餘良遊知不厭卜築意何如

秋日閒居有懷黃大宗伯

萬里溫陵道含情憶舊遊
夢迷明月夜人老白蘋秋
海闊休看鴈山深自倚樓
何時江路柳重見木蘭舟

山中寄徐少宰丈

契闊同心侶多年嘆索居
吳門遙繫馬魯國久懸輿
歲晚憐交態天長闕報書
悠悠清汶水一為覓雙魚

穀城山館集卷九

欽定四庫全書

穀城山館集卷十

明 于慎行 撰

五言律詩

暮春邢子愿侍御過訪邀登虎窟山洞遇雨和

韻

春盡無登眺留山待客來殘花巖際落野席雨邊開霧
合峰陰樹雲飛洞口臺醉忘歸路遠昏夜踏泥迴

子愿過宿雲樓小酌用韻

看山常獨醉，無奈索居何。那值春光暮，能邀上客過。鈎
簾芳樹近，揮麈白雲多。欲似南樓月，胡牀發嘯歌。

子愿飲東流池上

春入桃源路，飛觴日未斜。溪頭逢燕子，池面落楊花。聽
樹蕭蕭雨，看山片片霞。與君忘世慮，沈醉即為家。

子愿飲天柱峰下贈吳人薛文學南旋

縹緲高峰下，相從躡屐來。攀崖行覓草，歌石坐傳盃。半

嶺開瓊觀中天倚玉臺
吳門應繫馬有客岱宗迴

倚檻

倚檻多佳氣
高峰斂夕曛
林梢斜上月
麥隴細蒸雲
宵柝連城動
田歌隔舍聞
空岩響麋鹿
地僻亦驚羣

憶鶴

山莊舊畜一鶴飛
去已久至常思之

獨鶴曾為友
翩飛已隔年
幾時歸華表
何處覓青田
影斷空山月
聲淒遠樹烟
瑤臺應有伴
寧憶舊林泉

放鹿

莊有二鹿鎖置
小園憐而出之

園鹿知無恙，羈棲亦自愁。
本非籠檻物，豈有稻粱謀。
縹雲中駕虛無海上遊，
只應常放汝相伴踏林丘。

樓月

小樓涼不寐，白月靜娟娟。
半嶺含秋氣，千林滅晚烟。
海邊烽火動，塞上羽書傳。
此夜關山曲，寒光萬里懸。

蘿軒

室成無四壁，為藉綠蘿陰。
五月清風至，空庭白日深。
野花猶戀樹，徑竹未成林。
幸少藩籬隔，長堪對遠岑。

田父

欣承田父過相對亦陶然
泥客攜邨酒迎神釀社錢
木麻新受雨桑柘遠成烟
解問蘭臺史還書大有年

曉望

早涼開野曙迴眺出岩扉
日旭風吹面林香露濕衣
流鶯深樹語掉雀野田飛
來往逢邨叟相將荷蓀歸

偶成

傳道東封事扶桑路渺漫
不成威百粵何取度三韓
零

落王人節低垂大將壇可憐當日畫猶欲斬樓蘭

漫題

安東通漢節消息久茫茫事異降疏勒名殊受越裳先
朝多典故屬國有彝章何太蒼黃甚為謀但可傷

白莊對雨

山樓三日雨御袷不勝寒積水深苔逕頽牆損藥欄牛
羊隣巷狹鳧鷺野塘寬想見清溪漲應難著釣竿

憫雨

七日復七夜雨聲簷際懸遙山開復隱野水斷仍連禾
實真生耳苔文漫作錢為農資百畝不是敢憂天

晚霽

忽看雲霧斂返照逐歸鴉壅水籠漂麥分畦護種瓜樓
陰新見月山氣漸成霞遠憶遼陽戍軍聲急暮笳

雨中謝周師送酒

積雨不出戶空齋自檢書如何陶令酒亦到子雲廬閉
閣青山少開簾遠樹疎沈冥應獨醉無計屈高車

寄兒緯京師

炎風吹去馬幾日到長安
要識人間路休懷膝下歡
夙宵常展卷涼燠自加餐
世業餘叢桂還從上苑看

閒居

野築千林敞閒居萬事慵
朝廷踈記憶里巷少過從
雨急蕭蕭柳風踈落落松
傳呼何太劇海上舉邊烽

七夕溪舟初成同施還初文學王改子武元遊

汎

為嗜城南隱臨溪理釣舟適逢河鼓會小試武陵遊斜
日懸漁網涼風激棹謳馮君槎上漢吾道在滄洲

王欲
北上

故
云

八月十三日詣親溪亭汎舟二首

遠集亭邊騎新成檻外舟歲時開小會信宿是中秋倚

杖迎嵐氣褰裳渡石流泠然塵外賞無謝竹林遊

是日
賓主

七
人

晚涼人未醉移席汎烟波酒遠杯常待舟平岸易過鳥

邊浮晚吹花底度輕歌早見東林月秋光逼絳河

中秋同施還初文學攜門下諸友汎舟南溪

別館依泉石方舟集俊英陳詩吳季子講業魯諸生雲
樹空中影笙歌水上聲回橈應已夜山月好相迎

中秋同諸友南溪望月

此際秋無奈停舟望碧岑月華巖際滿夜色水邊深影
滅銀河浪光圍桂樹林南樓聞嘯詠誰識庾公心

九日無菊

山齋逢九日
悵望晚天霞
去歲曾飛雪
今年未見花
秋聲風落木
寒色雨侵沙
幸有盃中物
猶同處士家

送武舉王生北上

俠少多竒節
悲歌氣不平
偶探黃石簡
欲赴白登城
錦瑟壚頭醉
雕戈馬上橫
功成報明主
恥作魯諸生

寄吳觀我太史

聞道金閨侶
名山住已深
淹留依桂樹
棲息傍祇林
真偈閒常諷
新詩靜自吟
論思虛上列
懸切故交心

秋日寄鄒南阜吏部

美人南國渺江上有楓林道為談天重名因避地深十
年曾酒會千里片鴻音念爾關隆替能忘報國心

對雪聞方子公行賦送

寥寥逢歲宴飛雪逗年華霰薄初成雨風高漸作花寒
光連兔苑朔氣度龍沙遊子今何適關山路正賒

雪中獨酌

北風一以凜雨雪晝霏霏酒畔疑花落春前學絮飛田

家占歲事海國念戎機萬里三韓道征人幾隊歸

馮用韞宗伯訂約西遊登岱過期未至懷望遣

悶二首

自得高丘約脂車已隔年如何期屢易直作信空傳海
色雲門上秋光日觀前側身凝望眼端擬四愁篇

海上碧雲斷佳期誰為留已看過九日原約近中秋歲
晚常思會身輕未厭遊遲回應有為無處問書郵

上坤山月巖寺陳鐵峰孟我疆諸君會講處也

何代標金剝層崖半倚天松門低落日石竇瀉鳴泉野
曠寒烟積山高細路懸因懷蓮社客惆悵講堂前

過陽穀店山下問小洞庭遺迹是唐時東平太

守蘇源明宴處

蠶尾峰頭路當年小洞庭汙邪餘水國文物閉山靈野
草微茫白川雲黯慘青猶疑歌舞地笳鼓震空溟

送吳澄陽文學還越

翩翩江左彥藻思薄雲天觀樂重遊魯談經舊客燕歸

舟鴻鴈後別酒菊花前明歲長楊獵看君賦草傳

哭元戎少泉侯兄八首

故國逢今日元樞失舊臣人間銷電露天上化星辰磊
落英雄氣悲涼骨肉親哀歌轉難就握管涕盈巾

少年拋翰墨笑入五陵場一劍橫秋色千金去故鄉韜
鈴分禁旅節鉞莫夷荒何意將軍樹風殘一夜霜

男兒身手健壯歲握兵符試買千金駿輕關十石弧登
壇名已遂裹革志猶孤回首黔中路年年泣鷓鴣

羽書今正急誰勒玉關銘窮海纏兵氣中原落將星俠
場思意槩蠻府悞威靈尚欲隨風雨鞭螭下紫庭

少小追遊地今來白髮新半生羈仕路垂老戀交親間
濶無經月歡娛得幾春可憐花底醉已作夢中人

吾家門巷改池草盡成塵念我殲同氣依君豈異人徵
歌花塢夜載酒竹溪春舊侶無多在相看涕泗頻

朝來過舊館遺迹總堪嗟曉月沈弓影秋霜溢劔花護
羌元入塞去病不為家素業青門外惟餘數畝瓜

攝提星入次單闕鳥來旋正近懸弧旦翻成掛劍年祠
方同畏壘冢得象祁連汗血俱龍種青箱事可傳

公以
生辰

前數夕沒又貴
陽有生福故云

秋日荅常心吾中丞寄問二首

別後渺愁予秋來得報書未過衡渚鴈早下武昌魚天
地方多難江湖有索居間踪休更問頭白侶樵漁

何地容高隱江樓萬竹青曉猿諳報客夜鶴解聽經天
迴懸御月山深閱歲星會傳宣室召莫勒草堂銘

贈詩僧

擁錫來吳嶽詮經住魯城
王孫除館待郡牧掃門迎
藻思烟霞潤風神水月清
談詩吾已倦亦欲學無生

送朱元長北試京兆

西風吹桂樹欲發上林枝
河畔停舟夜花前對酒時
愁深談舊事別久見新詩
幾日泥金到山中有夢思

送方胥成山人南遊淮上

君行復幾歲今夕問歸舟
客久黃金盡天寒白露秋
寸

心酬俠氣斗酒結離愁莫叩淮南幕中丞抱國憂

贈鄔章甫道契

翛然林壑秀家學似枚臯作客懷長缺驚人試彩毫旅
愁滄海月歸夢廣陵濤努力攻騷雅時名爾易高

雪中杏花

春寒無可奈愁思入韶華更落瑤臺雪還添上苑花凝
粧聊傅粉待暈始成霞試汎山陰棹東風滿若邪

雪後杏花

花時驚雪落雪後見花開
夜色梁園度春香漢苑來飄
簾還似雨聞笛半疑梅凍
溢枝頭燕依然社日迴

送徐南龍令君南旋

君行良不住河上理蘭檣
客夢齊山隔鄉心楚塞長
春歸見芳草人去思甘棠
日望雙鳧影翩飛近尚方

贈余古仙山人

別久鬢如絲金門老畫師
相逢春雨夜正是落花時
能事江湖得浮踪歲月私
舊遊今欲盡君去可依誰

三月廿八日飲侯六山莊四首

問訊東山館名花幾樹開
不愁春色去自有故人來
淑影明衣袖香風近酒杯
未須尊俎具且共倚亭臺

地僻宜佳會春歸待主人
蝶驚紅雨驟鶯狎綠條新
但聽歌盈耳休辭酒入脣
不堪回首地萬里一風塵

少小歡遊地君家舊竹林
每逢春酒夜常醉綠蘿陰
樹密雲過慢樓高月上深
婆婆看老態頗識故交心

聞鐘人未散倚席興偏長
曲按新聲度花從靜夜香
青

尊何地少白髮幾人狂更訂明朝約過子舊草堂

東園牡丹小會四首

老去憐交態春歸念歲華還將今日酒同對故年花色
染丹臺露香流玉洞霞惟應欄檻小不似五侯家

園林剛半畝木藥滿亭臺向日朝猶斂迎風夜盡開酒
從新歲待客是隅城來俗殺平章第朱門鎖繡堆

多少東風恨天香正滿林影搖春酒艷色傍玉樓深樂
曲臨時製花名按譜尋清平當日調回憶久沈吟

傾國俱名品呈姿媚一堂倚闌渾欲醉入座轉聞香月
下千金笑燈前百寶裝夜深春更暖忍負紫霞觴

夏日飲表弟劉敬宇水亭四首

水際芙蓉館芳辰每見招車停林外雨人過竹邊橋樹
影侵杯動花香入眼飄坐來聞白羽秋氣已蕭蕭

別業中丞舊新塘鑿更奇亭深見雁渚樹老鳳凰枝惜
往寧多日徵歡又一時洗盃酬愛弟偏憶渭陽詩

亦有池臺勝如君結構稀橫槎能作榭蟠木可為磯漫

取花行酒真愁露濕衣層軒銷暑氣赤日石林微
晚涼猶未倦改席倚亭闌膾鯉銀絲細調冰玉椀寒笑
開桃葉扇醉岸竹皮冠盃底中天月還應勒馬看

寄題新蔡水亭二首

聞道名王館深依上第開花間分島嶼雲裏出亭臺夏
洞藏陰雪晴流激暗雷不因人境近只擬是天台

主君賓客盛何處席長筵門簇看花騎池通送酒船星
霞垂夜彩鳧雁下秋烟未覺淮山遠空吟桂樹篇

汎溪

一曲無多路，洄沿自覺長。
近人堤柳細，隔水岸花香。
放鶴遵莎徑，觀魚坐石梁。
不教漁父問，此地即滄浪。

寄題貞白王孫赤霞館

藉甚天潢彥，才名滿帝家。
書藏東觀草，館號赤城霞。
夢裏常吞錦，毫端自吐花。
不知銀漢水，幾日見浮槎。

五月十三日南溪會集

高會南溪始，芳尊午日同。
登亭來暮雨，敞閣受林風。
歲

月飛花好河山醉眼中莫閒青玉盞俱是白頭翁

七日南溪會集

七夕始迎秋溪亭復此遊午涼慵舉扇夕雨罷登舟倚
杖窺雲樹停盃待女牛只憐天上夜亦向此時愁

七日夜雨

佳期方待夜雨氣轉氤氳愁望明河影翻成楚岫雲鵲
梁何地駕笙鶴會能聞未悟陰晴理休將巧拙分

中貞王孫過訪少岱山房酬贈二首

秋氣颯蕭森亭臯夕坐深美人滄洲興過我青楓林倚
劔衝星氣停盃待月陰小山叢桂在端復為誰吟

池閣三秋別山齋七月過車塵花際少雲氣酒邊多客
路蹇芳草征衣帶女蘿一歡吾欲醉且莫促鳴珂

寺山秋望

平楚淨寒烟高丘望渺然日斜虹帶雨野濶水浮天絕
塞南來雁長河北去船荒臺題仲父蕪沒幾千年

山亭

雨晴多物態秋敞坐山亭舊竹泠泠翠新蘿喬喬青荷
鉏分藥徑散帙閉柴扃掛樹雙言鳥繁辭盡日聽

南溪秋汎

野館無停轍秋塘有繫舟怯同俗客飲且喚老妻遊蝶
欲疑紅樹鷗應笑白頭漁人休借問此是鹿門儔

小坐

小坐霜天夕空庭竹樹深城笳凝暮靄樓月斂秋陰漸
老消塵慮長貧現道心摩娑舊如意懶擊唾壺吟

東園即事

蓬門長日閉，俛仰自為歡。
酌酒邀花飲，分魚喚鶴餐。
閒看秋水淡，老覺世塗寬。
不是無蕭索，人間事更難。

秋日南溪閒眺得李宗伯丈書

溪閣非無事，秋清日轉長。
掃花安鹿砦，帖石補魚梁。
高樹留新雨，平波澹夕陽。
遠書何意至，三讀素心傷。

中秋東園小集

漸上千峰月，真銷萬里雲。
秋從今夜半，人是舊時羣。
桂

影寒應濕簫聲靜欲聞相看疑白髮總似兔毫分

九日登小岱山

九日罷徵歡孤尊眺嶽壇晚烟千室翠落日萬峰丹已
有鴻堪聽還無菊可餐江湖回白首愁見是長安

木芙蓉

一本芙蓉樹三秋覓地栽尚逢南客問果向北亭開色
落仙人掌香浮太乙杯可憐霜夜月華艷滿池臺

九月廿五日東園菊下小集四首

朝來全罷酒秋盡復看花布席輕張幔題名細剪紗開
時團玉露餐處帶明霞蕭瑟還憐汝含芳綰歲華

今歲重陽菊翻迎十月看猶餘秋日映已近北風寒凍
蕊開逾艷貞心抱自完寥芳思有贈惆悵倚亭闌

花開原五色色色斷人腸浴出俱含雨粧成總奈霜淒
涼傾國品酷烈歲寒香回笑春桃李隨風委艷陽

歲逢鴻雁候日敞菊花筵祗恐虛秋色誰愁負酒錢移
燈情繾綣卷袖醉踰躑且采簪華髮相將步月旋

東園延吳翁晉病不能陪

郊園常不到客席欲凝塵正喜軒車過翻將藥裹親竹
陰堪受暑花氣尚疑春座上南山色聊憑代主人

病起從吳翁晉郭汝承遊南溪亭上

甚小幽棲地能令二妙從文中吳季重名下郭林宗解
髮臨高澗浮盃望遠峯本因行藥至燕笑及聞鐘

寄雪浪上人一首

別來人欲老尺素不曾逢每望長干月疑聞內院鐘雨

花飄座塵雪浪起林峰此際能相憶江雲隔幾重

送歸義望峰首座南遊覓水陸閣緣

梵宇禁城邊依棲不記年山中逢白足夢裏憶青蓮已
受真乘偈聊修福地緣爾時多寶聚龍象滿人天

歸義雲松禪師勅封郎官寄贈

如何塵外侶亦受世間名佛果修無漏官階號不更紫
衣宮錦製丹誥法音迎為問酬恩地朝朝梵誦聲

贈玉山徐仲昇

君遊渾未倦，俠骨尚翩翩。壯志禽填海，輕姿鶴上天。詞人今古賦，策士短長篇。可奈忘機叟，銜盃但欲眠。

聞郭汝承京兆捷音志喜

望望長安道，秋高紫氣新。燕臺真得駿，漢苑欲歌麟。笑折看花屐，狂呼漉酒巾。老懷無浪喜，個是眼中人。

穀城山館集卷十

欽定四庫全書

集部

穀城山館集卷十一至

詳校官中書臣沈鳳輝

侍讀臣孫球覆勘

總校官中書臣朱鈐

校對官中書臣潘奕雋

謄錄監生臣莊承替

欽定四庫全書

殺城山館集卷十一

明 于慎行 撰

七言律詩

御試大祀方丘應制

聖代郊禋典秩崇
祇壇午夜肅齋宮
五方琮帛坤靈會
八變雲韶帝德通
星斗踈明香霧裏
旌旗回合曉霞中
禎符欲勝汾陰日
萬歲聲聞動遠空

閣試中秋

風露西清晝漏殘，月華縹緲鳳城端。
三天如水銷銀漢，萬里無雲瀉玉盤。
燕塞河山秋氣迴，漢家宮闕夜光寒。
一聲長笛思千里，倚嘯重樓十二欄。

館課聞蟬

宴坐虛堂對午陰，宮蟬處處遞悲吟。
沈涵自咽金莖露，斷續長依玉樹林。
鎮日繁聲塵界遠，寥天清籟禁雲深。
蕭森正自多秋興，聽入冷風轉不禁。

館課冬至朝天官習儀遇雪

玄都三日敞朱扉
綿蕞初開素雪飛
壇月低凝仙闕
樹宮花徐落侍臣衣
千門爽氣龍樓曉
十里寒光玉佩歸
明日君王郊泰畤
總疑瓊島在天畿

館課冬至齋居

緹室灰飛晷欲長
清齋仙館坐焚香
雪殘樓閣虛瓊樹
月出簪裾滿玉堂
筆望五雲迎舜日
心隨一線入堯裳
明朝負紫趨陪地
只在瑤壇帝座旁

全宋文卷十一
卷十一
秋日有懷朱長君可大

談經幾日別東州回首誰登濟上樓
素月芳尊成遠夢長天極浦足離愁
書傳薊北霜鳴遠人在漳南玉露秋
一水蒹葭江口路何時却見北來舟

代壽太宰蒲坂楊公六十

璇樞一柱舊承天花甲今稱始壽年
九塞烟塵歸指顧兩朝文物入陶甄
南山近傍芙蓉闕左省高開玳瑁筵
自是關西舊閎閣朱輪繡轂滿堂前

送李敏齋內史奉使洛陽過家覲祖

玉節仙郎下紫薇元公親授老萊衣
暫辭左掖閒雞樹遙向西園佇鷺旗
帆度河陽秋欲盡雲低淮浦鴈初飛
重閣倚杖歡應甚萬石門前內史歸

酬于子冲文學見寄和韻

回首齊州思有餘玉函秋色近何如
如王孫自長山中桂青鳥初傳海上書
薄俗交遊誰得意平生懷抱爾離居
請纓漢闕終生在二十才名綠鬢疎

送張月洲先生還閩二首

長欽何年歸粵海，褒衣此夕入燕州。
傳經正想三秋待，負笈驚看萬里遊。
杖屨重依春滿座，琴尊數對月當樓。
不堪明發橫門道，又向河橋問去舟。

綽約紅顏傲赤松，翛然七十不龍鍾。
長年細檢三山錄，健步全虛九節筇。
韋孟家聲傳世業，伏生經術號儒宗。
歸與好在胡麻飯，瑤圃天開海畔峰。

奉寄家兄無妄二首

載筆虛當侍從年多慙無賦奏甘泉
愁中月露西清夜
夢裏松蘿故國天
石閣當山多鳥道
蓬門臨水半人烟
別來兩度經春草
誰傍池塘白晝眠

吾兄俠氣舊昂藏
抱玉空山鬢有霜
白石常封燒藥竈
紅泉自遶讀書牀
休從漁父思蘭芷
漫羨詞臣賦栢梁
此際秋風生桂樹
歌殘招隱意蒼茫

寄侯將軍塞上

白葦黃榆玉塞秋
將軍新試錦貂裘
蓮花吐劍軍聲壯

明月驚弦敵騎愁
畫地常開風后陳
解鞍獨飲月支頭
班生故是文章裔
投筆如今號虎侯

大司空朱師分賜鱒魚賦謝

五月霜鱗滿貢船
長安到日色猶鮮
牙檣錦纜來千里
玉筋金盤下九天
畫省不緣宮府賜
蓬門寧覩吏人傳
河淮一葦司空績
歲歲江魚入御筵

慰于子冲内艱用可大韻

閩門此日欲何依
巖桂庭護事事非
千里空懸遊子夢

一寒誰念故人衣
春風四壁餘長缺
夜雨空堂有斷機
莫向乾坤悲落魄
三齋年少似君稀

送少傅陳相公致仕還蜀二首

黃閣功成尚黑頭
遽將簪組付滄州
商年伊摯初歸政
漢代韋賢早拜侯
東觀藏書三殿草
西風倚棹五湖舟
橋邊負弩空陳迹
將相何人畫錦遊

天書曉下禁門東
白壁黃金出漢宮
祖帳一時傳道路
車塵到處走兒童
秦雲夜擁函關月
隴樹秋開劔閣風

愛殺嘉陵江水綠垂竿不擬獵蜚熊

送陳玉壘太史扶侍歸蜀

露下清秋奈別何玉杯瑤瑟起離歌人經漢苑青山近
路達巴江錦樹多萬里檝書迴鴈字三年珥筆共鸞坡
題橋總似相如舊却奉元公駟馬過

冬至院中齋宿酬朱可大文學詩問用韻

瑣院森沈接苑牆齋居寒夜集冠裳風回畫燭香初散
月上花磚漏轉長闕下御雲將爛漫歌中白雪早飛揚

憑君為獻甘泉賦，詰旦鑾輿出未央。

春日同羅虞臣同御李本寧太史朱可大進士

遊摩訶菴得冬字

春盡看春興未窮，還陪仙侶叩禪宮。
香臺路入烟雲轉，石竇泉從薜荔通。
花落諸天渾是雨，松臨午日不聞風。
當歌一醉愁無賴，回首紅塵綺陌東。

送趙少虛先生下第二首

三月花飛上苑春，花前黯淡送歸人。
賦成却抱文園病

老去選甘栗里貧月出離筵關樹曉塵清客路隴梅新
熙朝自少南山隱莫向桃源學避秦

彈鋏重歸奈爾何乾坤今日尚蹉跎黃金不買同時賦
白石誰憐半夜歌北嶺春蘿仍對酒西汀烟月且披蓑
他時共睹孫弘對華髮名成首四科

送鄭舒軒先生下第

宮草萋萋滿禁城乘春又向日邊行一帆風雨還家夢
十里鶯花去國情彩筆久傳鸚鵡賦青山頻聽鷓鴣聲

石渠倘許推師授經術應齊漢五更

送沈道立太史奉使肅藩

親函璽綬賜王侯百二秦關亦壯遊
華嶽三峰天外落
洪河一葦日邊流星潢色動金城
夜鼓角寒生玉塞秋
咫尺崑崙應可問
乘槎莫到海西頭

雨行北安門外湖上

湖上朱闌倚畫舟
一天涼雨漢宮秋
平橋蘆荻蕭蕭冷
別浦鷗鳧汎汎流
霧色迷茫三苑樹
波光隱見五城樓

由來仙掌多濃露十里芙蓉接御溝

在告書懷柬可大

金門何事轉愁予日見紅塵上錦裾祇為思歸長數鴈
幾因多病欲焚魚鄉心瓦上三更雨客計牀頭數卷書
幸藉旬休聊閉閣文園從此臥相如

高太孺人輓章太史崑崙母也

北堂典訓舊知名東觀圖書已勒成自有龍章馳上苑
誰教鶴馭返瑤京霜飄楚峽玄猿淚月暗巴江杜宇聲

歸路淒涼無限恨微吟不似賦西征

送李璿邨叅軍奉太夫人南歸廣陵

陳情曉下紫宸朝阿母雲輿度絳霄珠履名高西府幕
斑衣色借上公貂花深楚苑春鳴棹月滿隋堤夜聽簫
別後思君何處望淮南芳樹廣陵潮

秋日有懷賈德修諫議朱可大文學

袒褐論交歲幾更寥寥雙眼為誰明五雲公子才無敵
三省仙郎諫有聲南國久疎鴻鴈字東山同繫薜蘿情

衡門兩度經秋草華月空梁夢不成

過香山寺誦先兄冲白送予赴濟詩潸然有感

用韻呈亞沂崔君

寥落空山古殿寒十年前路事辛酸
空餘彩筆題紈扇不復長歌醉玉盤
漢苑春花終有恨荆庭秋樹慘無歡
平生意氣惟君在宿草成烟淚未乾

山中有懷侯姊丈叅戎

魯國諸生舊有文又從投筆際風雲
王孫盡自迷歸路

卿子誰知號冠軍
樞上驂騮天廐馬
帳前鼓角羽林羣
同時年少還相憶
曉月山城更夢君

壽伯父九十賜爵

田家亦有地行仙
擊壤昇平近百年
三代遺恩身自遇
五朝舊事口能傳
登山時復拋邛杖
對酒猶能釀社錢
十載松楸成遠恨
歌逢棠棣轉悽然

部檄以修史趣上

當年束髮侍承明
一臥東山歲月更
築室還臨芳草路

金定四庫全書
卷十一
趨朝猶記禁鐘聲
愁邊四壁家如舊
病裏三都賦未成
傳道長安飛詔下
蘭臺已注史臣名

九月廿一日同趙少虛文學李前峰司馬飲宮

秀才山房對菊三首

西風蕭瑟鴈聲哀
處士籬邊菊樹開
翠幄總從霜後見
幽香半自雨中裁
高雲錦石明秋日
淡蕊繁枝映酒杯
況是故人同駐馬
不妨沈醉碧山隈

芳筵高會聽鳴笳
徒倚疎籬感歲華
九日已過南浦鴈

一尊還對故園花
繁英爛漫迎人冷
踈影蕭條向月斜
白酒東籬成往迹
千年秋色落誰家

木落霜天萬樹林
誰憐艷菊自蕭森
一叢寂寞香難近
百草飄零色更深
地僻常能留客醉
秋高纔得對花吟
明年又作燕城客
水畔東籬何處尋

癸酉春日閒居四首

孤蹤一寄白雲間
鶴渚蘭汀夢亦閒
病起鶯花憐故國
春來蘿薜滿青山
浮沈歲月空高枕
歷落風塵且閉關

東望石閭仙氣滿欲尋瑤草駐紅顏

早歲承恩直漢宮石渠仙署鳳樓東時沾賜酒傳深禁
每聽吹簫度遠空赤筆春裁三殿草朱衣寒飈五橋風
只今臥病荒山裏滿眼氤氳想像中

憶昨追隨法從班五更燈火叩重關雲開蔽座雙團扇
月出瑤階萬佩環一自樵漁來海上忽傳弓劍落人間
江邛風雨孤臣淚清夢猶能識聖顏

牢落中原嘆索居長安朋舊渺愁子池邊倚馬宮雲近

臺畔開尊苑月虛別夢幾看南渚鴈春風難覓汶陽魚
幽棲祇自成疎懶不是文園有著書

送劉水部碧宇上保定太守

白露蒹葭望渺茫使君千騎發東方斗邊一夜仙槎影
河上三春畫省香劔氣秋空寒易水簫聲明月憶維揚
他時欲識扶風守指點題名在建章

七汲登舟留別親友

閭門烟樹此時分回首春江惜鷺羣金匱虛當東觀草

荷衣實負北山文
花前酒盡人將遠
雨後帆開日未曛
滿眼浮榮渾是夢
驪歌繾綣不堪聞

故城道中夜泊

長堤高柳暮雲平
入夜扁舟堰口橫
千里烟波通海戍
三家邱落雜齊聲
殘燈微照孤帆動
短笛寒吹片月明
客枕清冷渾不寐
滄洲一望颯然驚

安陵雨泊

廣川城北倚扁舟
寒色蕭蕭對驛樓
過雨菰蘆驚午夢

乘波鳧鷖激中流長天積水千帆暮斜日疎林五月秋
指點津亭問前路居人為說古瀛洲

天津

白浪浮空拍海門天津城下萬艘屯吹簫伐鼓中流渡
賣酒烹魚何處邛黠霽平林含雨氣迷茫遠岸吐潮痕
江淮百億輸王府歲歲梯船奉至尊

潞河舟中有懷可大時亦從江右北上

孤帆遙夜倚汀洲却望天南憶舊遊越水吳山何處夢

楚江燕月此時舟鴻聲欲斷三秋信海色遙含兩地愁
同去長安不同到與誰先上酒家樓

謁陵

天作高山擁帝京九陵臺殿鎖重城靈旗風雨千巖應
閣道松楸萬壑平河嶽東來盤玉氣關門北去起邊聲
祠臣展禮多悽愴濡露年年感聖情

送張泰字諫議出守衛輝

綠鬢金章出上林兩朝獻納主恩深宮雲曉映仙臺佩

禁漏春移畫省陰
酒入驪歌魂易斷
路隨明月夢難尋
知君坐嘯蘇門夜
竹影泉聲幾處吟

送于嵩毓年兄下第

薊門芳草路悠悠
尊酒相看憶舊遊
苑外春風楊柳陌
湖邊秋雨芰荷舟
論心暫解陳蕃榻
失意還凋李子裘
明夜思君孤館夢
蕭條雲月不勝愁

送劉鈍齋年兄下第

十載相看薊北遊
花前又欲起離憂
黃金色冷空留駿

白石歌殘自飯牛
驛路曉星看佩劍
海門烟雨繫漁舟
青藜何日還相照
劉向談經鬢欲秋

壽新城王太夫人七十

中朝甲第首諸王
壽母今符寶
婺光南嶽仙雲飄
鳳馭西池春色照
霞觴退朝絡繹金門佩
問寢氤氳畫省香
莫向清淮占世澤
璇波直共海天長

奉寄朱大司空老師

上東門外一沾巾
別恨千重總未伸
自古難酬知己遇

只今誰是報恩人，即教寥落江湖日。
轉識安危社稷身。
渭水不須勞夢卜，已從高閣畫麒麟。

新春報二兄書

鴈行中斷兩天分，南浦春聲昨夜聞。
池上夢回千里月，山中人隔幾重雲。
雄文未獻河東賦，壯畧曾觀隴右軍。
金馬浮沈休借問，只應猿鳥自為羣。

送劉太史奉使韓藩

名藩帶礪主恩恢，使節西遊亦壯哉。
玉署天香三殿迴。

桐函春色五雲開
川連博望乘槎路
地盡軒轅問道臺
歸向高堂行慶酒
斑衣可識尚方裁

為人題雙壽卷

鹿門真隱舊知名
藉甚仙郎漢列卿
歸院宮雲隨玉佩
上堂春酒汎瑤觥
斗邊劍合雙龍氣
月底簫分兩鳳聲
詎假金書傳閩苑
且看丹詔出層城

七夕

琪樹西風一葉秋
銀河清淺月如鉤
關前玉笛吹新恨

天上金梭織舊愁，鸞自飛回人欲盡。
鵲曾填處水還流，浮踪此際渾無賴。
脈脈遙心自倚樓。

秋日同館中諸丈飲謝都尉林亭

薊苑秋高望不窮，主家臺榭苑牆東。
凭闌暝入千峰雨，對酒寒生萬木風。
畫角聲殘龍塞遠，玉簫曲斷鳳樓空。
先朝邸第多零落，魯館依然氣色中。

除夕懷諸兄弟

九陌笙歌歲又闌，驚人時序漢長安。
凋蕭兩鬢池頭佩

寂寞三秋夢裏蘭上苑花從今夜發故鄉書擬隔年看
天涯兄弟應相念綠酒青燈可自歡

禁中春雪

五陵芳草欲成叢雨雪依然滿漢宮萬里關河銷紫塞
九天樓閣冷瑤空西山月出寧知曉上苑花飛不待風
徙倚銅龍正愁思陽春一曲賦難工

春暮偕沈澄川太史遊城南王氏園亭和韻

休沐相招盛會偏宜春苑路草芊綿重城樓閣籠春樹

曲島松蘿散曉烟風起花香飄檻外雨餘山色落尊前
由來杜曲多名勝斗畔猶疑尺五天

文華殿進講有述

珥筆承恩既有年論思今復厠羣仙春城日永紆清漏
曉殿雲深擁細旃褒拂天香開繡簡心迎睿想入瑤編
却慚經術元疎薄獻納無裨荷寵偏

恭代皇上奉祝聖母萬壽無疆詩

藐質冲齡御大方慈恩辛苦護垂裳祥開華渚仙源遠

金屋藏人卷十一
卷十一
慶行瑤池化日長上食親調金掌露舞衣時傍玉爐香
承歡幸撫昇平會薦壽鴻儀倣未央

秋日龍華寺小坐

苑西橋畔古祇林滿院松杉畫鬱森山色平連三殿影
湖光曲抱五城陰尊前細雨飄仙梵檻外涼風急暮砧
宴坐不知清晝永一函經呪對沈吟

西苑鼇山恭紀

別苑春宵翠殿開華燈寶炬滿蓬萊花分火樹千枝落

星轉璇儀萬象迴九陌香塵隨地合六宮歌管自天來
恭逢玉燭均調日願取三山作壽杯

遣迎子冲可大二丈八對

旅鬢風塵感歲華故人今日尚天涯三年夢隔長安月
千里春期上苑花濟北鴻聲來擁傳湖西雪色隱乘槎
即看醉握雙龍劍依舊燕城臥酒家

子冲可大二君新第同飲朝天宮臺上

倚馬高臺興不禁垂髻舊侶共登臨三山暮雨飛仙闕

萬戶春花滿禁林，縹緲簫聲雲裏近。
縱橫劍氣酒邊深，回思二十年來事。
今日吾曹可醉吟。

送許悟菴鍊師還雲翠山兼寄山靈二首

舊時曾作小遊仙，寄迹靈峰偶偓佺。
賣藥忽從都市見，還丹豈向世人傳。
瑤壇月出渾如水，玉洞花開別有天。
歸去正逢春色老，采芝可傍紫雲眠。

家近名山住亦稀，別來清夢轉依依。
愁生猿鶴花迷徑，恨結松蘿月上扉。
青鏡空悲遊子鬢，紅塵偏染仕人衣。

憑君寄語山靈道早晚抽簪向翠微

寄庠師周介軒先生

千里蕪陵水國天白頭博士枕書眠人從對酒青燈夜
事憶談經絳帳年一札希逢西楚鴈雙漿好汎北湖船
慚從魯國諸生後儒術無成侍禁筵

登雙寺閣贈金陵懷上人

倚馬東林訪惠休上方鐘磬一登樓千峰夕送花宮雨
萬井涼生桂苑秋地向紅塵開淨土人皈白社結良遊

不須却憶飄蘆處江北江南總帝州

穀城山館集卷十一